

SATHAU KHAWNVAR (MOMBATI) SIAM

Saikungi
Dy.Chief Executive Officer (Marketing)
Mizoram KVI Board

Hun engemaw tichen a\ang khan Sathau Khawnvar hi Mizote hian kan lo siamchhuak ve ta a, a Sathau (paraffin wax) hi state pawn a\anga la lutin eizawna atana hmang pawh kan awm ta thluah mai. Paraffin wax hi petroleum product a nih angin oil thlitfimna hmun a\angin chawkluh \hin a ni. Tunhma chuan Sawrkarin a khuahkhirh \hin a, tunah erawh chuan mimal tan pawh awlsam zawkin a lakluh theih tawh a ni. Paraffin wax hi a tlang hlawm leh a mumte (granules) in an siam deuh ber a, chu chu Sathau khawnvar siamtuten an chhuan tui hnu-ah an duh ang tiat burah la hrui (wick) vuahin an chhunglut mai a, a daih hnuin an thur chhuak a, hman theih a lo ni ta mai a ni. A siamdan hi a mawlmang hle a, mahse chutih rual chuan tuihuh a ngai thei lo hle bawh. Vai ramah chuan a tih rimtuina te telhin a rawng pawh chi hrang hrang neiin an siam chhuak a, heng birthday, inneih leh an hunpuiah an chhi uar thei hle a, keini Mizote erawh hi chuan chhit enah lo chuan kan hmang nasa lem lo. Hei vang hian rawng chi hrang siamchhuah hi hmuh tur pawh a tam lo khawp mai.

Mizoram KVI Board chuan kum 1989-90 khan Mombati siamna atan loan a pe chhuak a, hemi hnu lam a\ang hian eizawna atana hmang pawh an lo pung chho ta a ni. A siam dan a mawlmang bakah hmeichhe awmnem zawk tan pawh hna harsa a awm lo a, mahni inlum a tih theih vek a ni. Kan State hi power dehchhuah lamah kan la hnufum deuh avang te pawh a ni mahna Sathau khawnvar mamawhna hi a la sang hle a, tun thleng hian eizawna \ha tak a la tling a ni.

Mombati siamna bawm (molds) hi chi hrang hrang leh size hrang hrang a awm a, Mizote hi chuan alluminium leh metal a\anga siam hi kan hmang deuh ber. Vai ram-ah chuan rubber, plastic, glass leh thil dang a\angtein a bawm hi an siam a, design nalh tak tak te an nei a ni. Baktawng-ah hian alluminium a\anga siam bawm lei tur a awm bawh. Sathau (paraffin wax) hi 50kgs bag leh 25kgs bag in a lo kal ber a, a rih zawng hi chu IOC lamin an rawn pek dan ang zela hralh chhuah a ni. **Mizoram KVI Board Sales Emporium, Aizawl-ah hian lei theihin a awm reng bawh a ni.**

Pu C. Lalthangvunga, Bethlehem Vengthlang, Aizawl hian kum 2003 a\ang khan Mombati siam hi eizawn nan a hmang \an a, vawiin ni thleng hian an eibel ber la niin an siamchhuah pawhin pun lam a la pan reng a, amah biangbiakna lo nei lawk ila-

Zawhna : Pu Thangvung, hei mombati siam hi eizawna berah i hmang niin kan lo hria a, thla khat chhung hian eng zat te nge i siam zawh theih a, chuta \ang chuan eng zat nge i lakluh theih \hin le?

Pu Thangvunga : Siamchhuah theih zat hi chu a tam khawp mai a, amaherawhchu, mamawhtu an tam dan a zir hian kan siam mai \hin. Chawhrualin thla khatah hian Bag 10 (5qtls) vel siam ang kan ni a, cheng 25000 bawr vel kan hlawh ve thin. A chang chuan thla khatah Bag 20/30 siam chang pawh kan nei.

Zawhna : A hralh chhuah lam te hi engtin nge in tih a, khaw dangah te in thawn chhuak ve em?

Pu Thangvunga : A hlawm a kan pek tur hi chu motor-in kan phurchhuak mai a, a mal a hralh tur ho hi chu emin kan phur chhuak a, kan vahpui \hin. Aizawl khawchhung bakah Saikhamakawn, Durtlang leh Sairang ah te kan pechhuak bawk.

Zawhna : In chungkuain in thawk nge hlawhfa in la?

Pu Thangvunga : Hlawhfa hi regular in pahnih kan la a, kan fa u ber leh kan nu nen kan pathumin kan thawk bawk.

Zawhna : Eng zat khawsa nge in nih a, fa eng zat nge in chawm le?

Pu Thangvunga : Fa pathum kan nei a, ka fate pahnih chuan college-ah leh high school ah lehkha an la zir mek a ni.

Zawhna : A nih leh hei chungkaw chawm nan ber a i hman Mombati siam hi khawi a\anga i zir nge? Training te i nei em?

Pu Thangvunga : Ka thiam \anna hi chu kan veng Bethlehem a Mombati siamtute a\angin a ni, rei fe ka siam tawh hnuah 2017 khan ka training leh.

Zawhna : Khawi hmunah nge i training a, tah chuan eng nge thiam belh te i nei em?

Pu Thangvunga : NSIC bul tumin Mizoram KVI Board Training Centre, Zemabawkah thla khat chung ka training leh a, hetah hian Mombati rawng chi hrang hrang pek dan te, rimtui telh dan te leh mamawh hun a zir a design siam dan te min zirtir a, ka chhawr \angkai viau mai. Amaherawhchu, a hmanrua te kan neih kim loh avangin kan siam chhonzawm ta lo va, siam chhonzawm theih a chakawm khawp mai.

Zawhna : Sawrkar \anpuina emaw, Bank loan emaw i hmu tawh em?

Pu Thangvunga : PMEGP loan hi vawi hnih ka dil tawh a, interview naah chuan ka tling zel a, mahse bank lamah ka tlang thei \hin lo a ni. Sawrkar \anpuina lam pawh engmah ka hmu lo a, keima thawhchhuah ve te tea ka hmalakna a ni e.

Zawhna : Zau zawk a hmalak theih ni se, a hralhna lam te a harsat i ring em?

Pu Thangvunga : Mi mamawh ang zel a siam kan ni a, hralhna lam hi chu a harsa lo turah ka ngai. Sum tam zawk te chu nei thei ni ila, tih len zel a, tun a kan siam ang ni lo design nei te pawh siamchhuah belh a chakawm khawp mai.

Industry Meichher

Jan-Mar, 2020